

**ЎЗБЕКИСТОН РЕСПУБЛИКАСИ
СОҒЛИҚНИ САҚЛАШ ВАЗИРЛИГИ**

**ЎЗБЕКИСТОН РЕСПУБЛИКАСИ
ОЛИЙ ВА ЎРТА МАХСУС ТАЪЛИМ ВАЗИРЛИГИ**



ТОШКЕНТ ПЕДИАТРИЯ ТИББИЁТ ИНСТИТУТИ

КУЗАТУВ КЕНГАШИ

НИЗОМИ

ТОШКЕНТ – 2022 ЙИЛ

Мазкур Низом Тошкент педиатрия тиббиёт институти Кузатув кенгаши
мажлисининг 2022 йил “31” енвар даги 1-сонли баённомаси
билан тасдиқланган

“ТАСДИҚЛАЙМАН”
Кузатув кенгаши раиси

т.ф.д, профессор

А. В. Алимов

2022-йил “31” декабр

I. Умумий қоидалар

1. Ушбу Низом Тошкент педиатрия тиббиёт институтининг Кузатув кенгаши фаолиятини тартибга солади.

2. Кузатув кенгаши Ўзбекистон Республикасининг “Таълим тўғрисида”ги Қонунига ва Ўзбекистон Республикаси Президентининг 2018 йил 7-декабрдаги “Ўзбекистон Республикаси соғлиқни сақлаш тизимини тубдан такомиллаштириш бўйича комплекс чора-тадбирлар тўғрисида”ги ПФ-5590-сон ҳамда 2019-йил 8-октябрдаги “Ўзбекистон Республикаси олий таълим тизимини 2030-йилгача ривожлантириш концепсиясини тасдиқлаш тўғрисида”ги ПФ-5847-сон Фармонлари, Ўзбекистон Республикаси Президентининг 2021-йил 24-декабрдаги “Давлат олий таълим муассасаларининг академик ва ташкилий-бошқарув мустақиллигини таъминлаш бўйича қўшимча чора-тадбирлар тўғрисида”ги ПҚ-60-сон ҳамда “Давлат олий таълим муассасаларига молиявий мустақиллик бериш чора-тадбирлари тўғрисида”ги ПҚ-61-сон Қарорлари ва бошқа қонунчилик ҳужжатларига мувофиқ ташкил этилади ҳамда институтнинг бошқарув органи ҳисобланади.

3. Кузатув кенгаши юридик шахс ҳисобланмайди ва давлат рўйхатидан ўтказилмайди. Кузатув кенгаши ўз фаолиятини жамоатчилик асосида амалга оширади.

4. Кузатув кенгаши таркибига вазирлик ва идораларнинг, кадрлар буюртмачиларининг, нодавлат нотижорат ташкилотларининг вакиллари, жамоатчилик вакиллари, ҳомийлар, шунингдек институт фаолиятини такомиллаштириш ва ривожлантиришдан манфаатдор бўлган бошқа юридик ва жисмоний шахслар кириши мумкин.

5. Кузатув кенгашининг таркиби Ўзбекистон Республикаси Соғлиқни сақлаш вазири томонидан тасдиқланади.

II. Кузатув кенгашининг вазифалари ва ваколатлари

6. Кузатув кенгашининг асосий ваколатлари қуйидагилардан иборат:

Институтнинг узоқ ва ўрта муддатли стратегик ривожлантириш дастурини тасдиқлаш, халқаро эътироф этилган ташкилотлар рейтингининг юқори ўринларидан жой олиш бўйича мақсадли чора-тадбирларни белгилаш ҳамда унинг амалга оширилишини назорат қилиб бориш;

Институтнинг ўрта муддат учун шакллантириладиган бизнес-режаси ҳамда даромадлар ва харажатлар параметрларини тасдиқлаш, уларнинг ижросини муҳокама қилиш;

Таълим йўналишлари, мутахассисликлар ҳамда ихтисосликлар бўйича тўлов-контракт асосида ўқишга қабул параметрларини белгилаш тўғрисида қарор қабул қилиш;

Институт олдига қўйилган вазифалар ижроси, мақсадли кўрсаткичларга эришиш ҳолати бўйича ректор ва проректорлар фаолиятини ўрганиш ҳамда ахборотини эшитиш;

Институтнинг ички аудит ва молиявий назорат хизматига молиявий назорат ўтказиш учун қўшимча топшириқ бериш ҳамда назорат тадбирларининг натижаси юзасидан ҳисобот олиш;

Институтни ривожлантириш ва унинг молиявий фаолияти билан боғлиқ масалаларни ҳал этиш, шу жумладан нодавлат ноижорат ташкилоти кўринишида мақсадли капитал жамғармасини шакллантириш;

Илм-фан ва инновацияларни ривожлантиришнинг устувор йўналишларидан келиб чиқиб, институт инновацион ва бошқа жамғармалар маблағларини сарфлаш тартиби ва йўналишларини мустақил белгилаш;

Институт раҳбари ва ходимлари ҳамда профессор-ўқитувчилари фаолиятига баҳо бериш, улар фаолиятининг самарадорлигини баҳолаш мезонларини (KPI) тасдиқлаш;

Институт ҳамда улар ҳузуридаги таълим ва илмий бўлим/бўлимларнинг раҳбар ва ходимлари, профессор-ўқитувчилари, шунингдек, хорижий мутахассислар учун меҳнатга ҳақ тўлаш миқдори ва самарадорлик мезонларига асосланган рағбатлантириш тартибини мустақил белгилаш;

Институтнинг бюджетдан ташқари ривожлантириш жамғармаси маблағларидан фойдаланиш тартибини, шу жумладан харажатларнинг тақсимланиш улушини мустақил белгилаш.

7. Кузатув кенгаши ўзига юкланган вазифаларни бажариш мақсадида:

Институтдан Кузатув кенгашига юкланган вазифаларни бажариш учун зарур маълумотлар ва ахборотларни белгиланган тартибда олади;

Институт Кузатув кенгашининг Низомини тасдиқлайди;

Институтда кадрлар тайёрлаш сифатини яхшилаш бўйича таклифлар ишлаб чиқади;

Институт ректорига институт ходимлари ва талабаларини моддий ва маънавий рағбатлантириш тўғрисида тавсияномалар беради.

III. Кузатув кенгаши таркиби, уларнинг зиммасига юклатилган вазифалар

8. Кузатув кенгаши иштирок этишнинг ихтиёрийлиги ва Кузатув кенгаши ваколатига тегишли масалаларни ҳал этишда унинг барча аъзоларининг тенг ҳуқуқлилиги тамойиллари асосида шакллантирилади.

Кузатув кенгаши, қоидага кўра, Кузатув кенгаши раиси (ҳамраиси), раиснинг ўринбосари, котиб ва аъзоларидан иборат таркибда шакллантирилади.

Кузатув кенгаши аъзоларининг сони тоқ бўлади. Кузатув кенгашининг шахсий таркиби ва раҳбариятидаги ўзгаришлар заруриятга кўра амалга оширилади ҳамда Ўзбекистон Республикаси Соҳлиқни сақлаш вазирлиги томонидан тасдиқланади.

Институт ректори лавозимига кўра Кузатув кенгаши аъзоси - котиби ҳисобланади. Институт ректори Кузатув кенгаши раиси этиб тайинланишига йўл қўйилмайди.

9. Кузатув кенгаши таркибининг камида 70 фоизи тегишли вазирлик, идоралар, кадрлар буюртмачилари, жамоатчилик вакиллари ва ҳомийлардан иборат бўлади.

Институт ректори ва проректорлари Кузатув кенгаши томонидан лавозимга тайинланади ва лавозимидан озод этилади.

10. Кузатув кенгаши ўз ваколатларини Институт кенгашига топширишга, шунингдек, Институт кенгашига кирувчи ваколатларни ўз зиммасига олишга ҳақли.

Кузатув кенгаши ўз ваколатларини институт ректорига бериш ҳуқуқига эга эмас.

11. Кузатув кенгаши раиси (ҳамраиси):

Кузатув кенгаши мажлиси кун тартибини белгилайди ва уни чақиради;

Кузатув кенгаши қарорларини тасдиқлайди ва уларнинг бажарилишини назорат қилади;

Кузатув кенгашининг йиллик иш режасини тасдиқлайди, шунингдек Кузатув кенгашининг йиллик иш режаси бажарилиши тўғрисидаги ҳисоботни Кенгаш муҳокамасига қўяди;

Кузатув кенгаши аъзоларига юкланган вазифалар бажарилиши юзасидан уларнинг ишини мувофиқлаштиради;

Давлат органлари ва бошқа ташкилотларда Кузатув кенгаши номидан вакиллик қилади;

Кузатув кенгашининг самарали ишлашини таъминлаш учун бошқа ваколатларни амалга оширади.

12. Кузатув кенгаши аъзолари қуйидаги ҳуқуқларга эга:

Кузатув кенгаши мажлисларида кўриб чиқиладиган масалаларни муҳокама қилиш ва ҳал этишда қатнашиш;

Институтда (ҳамда унинг таркибидаги бўлим/бўлинмаларида) таълим жараёнини ривожлантиришнинг долзарб масалалари бўйича Кузатув кенгашига таклифлар киритиш.

13. Кузатув кенгаши аъзолари Кузатув кенгаши таркибида ўз фаолиятини жамоатчилик асосида амалга оширадilar.

14. Кузатув кенгаши аъзолари мажлисда шахсан қатнашиши керак, шу жумладан, узрли сабаларга кўра ахборот коммуникация технологиялардан фойдаланган ҳолда масофавий тарзда. Узрли сабабга кўра қатнашишнинг имкони бўлмаган тақдирда Кузатув кенгаши аъзоси мажлиснинг кун тартиби бўйича ўз фикрини Кузатув кенгашига оғзаки ёки ёзма равишда тақдим этишга ҳақлидир.

IV. Кузатув кенгаши фаолиятини ташкил этиш

15. Кузатув кенгаши ваколоти доирасидаги масалалар бўйича қарорлар унинг мажлисларида қабул қилинади. Кузатув кенгаши қарор ва баённомалари кенгаш раиси ва котиби томонидан имзоланади.

16. Кузатув кенгаши ўз ишини ўзи тасдиқлаган режа асосида амалга оширади.

17. Кузатув кенгаши мажлисини ўтказилиш даврийлиги йилнинг ҳар чорагида бир маротаба, шу жумладан ахборот-коммуникация воситаларини кўллаган ҳолда масофавий тарзда ташкил этилиши мумкин.

Кузатув кенгаши раиси томонидан унинг аъзоларининг таклифлари асосида навбатдан ташқари мажлислар чақирилиши мумкин.

18. Кузатув кенгаши мажлисини ўтказиш учун кворум Кузатув кенгашининг тайинланган аъзоларидан иштирокчилари 50 фоиздан кам бўлмаган қисмидан иборат бўлиши керак.

19. Кузатув кенгаши мажлисида кўриб чиқиладиган масалаларнинг хусусиятидан келиб чиқиб вазирликлар, идоралар ва бошқа ташкилотларнинг раҳбарлари ва мутахассислари, институтнинг профессор-ўқитувчилари ва ходимлари, кун тартибига киритилган масала юзасидан мутассади ходимлар таклиф этилиши мумкин.

20. Зарурият бўлганда Кузатув кенгаши мажлиси ўтказиладиган сана, вақт ва жой Кузатув кенгаши аъзолари кўпчилигининг розилиги билан ўзгартирилиши (ёки кечиктирилиши) мумкин.

21. Кузатув кенгаши мажлисида қарорлар кенгаш аъзоларининг кўпчилик овози билан қабул қилинади. Кузатув кенгаши мажлиси кун тартиби масалалари бўйича қарорлар қабул қилишда Кузатув кенгашининг ҳар бир аъзоси бир овозга эга бўлади. Кузатув кенгаши аъзолари овозлари тенг бўлган тақдирда, раислик қилувчининг овози ҳал қилувчи овоз ҳисобланади.

V. Яқуний қоидалар

22. Кузатув кенгаши ўз фаолиятини Ўзбекистон Республикаси Конституцияси ва қонунларига, Ўзбекистон Республикаси Олий Мажлиси палаталарининг қарорларига, Ўзбекистон Республикаси Президентининг фармонлари ва қарорларига, Ўзбекистон Республикаси Вазирлар Маҳкамасининг қарорлари ва бошқа қонунчилик ҳужжатларига, шунингдек институт Устави ва ушбу Низомга мувофиқ амалга оширади.

**Кузатув кенгаши котиби,
институт ректори, т.ф.д., профессор**



Б. Т. Даминов

Юрист маслаҳатчи

С. В. Горюнова